

LA QUOTIDIANA

FMR Fundaziun Medias Rumantschas, Via da Masans 2, 7000 Cuirà, 081 544 89 11, redacziun@fmr.ch



PPS cunter Strasbourg

La PPS fa frunt cunter Strasbourg che ha dà raschun a las senioras dal clima. Il Cussegl naziunal refusa però ina disditga da la convenziun. **Pagina 2**



Mitschè da la controlla

La Controlla federala da finanzas na vegn betg en la chasa SRG. Il Cussegl dals chantuns ha refusà il mardi ina tala surveglianza. **Pagina 2**

FMR FUNDAZIUN
MEDIAS
RUMANTSCHAS

südostschweiz

GRISCHUN CENTRAL

1,9 milliuns per proteger Surava

Chesta gievgia decida igl suveran digl cumegn d'Albula/Alvra davart en credit dad 1,9 milliuns francs per en rampar cunter crappa a Surava. Igl è gio la sagonda gEDA tg'igl suveran stò approvar en tal credit – e chegl pigl madem project. Igl project vign dobel schi tger scu supponia anc avant treis onns. E perche gl dattigl tenor igl mastral Daniel Albertin «blers pitschens muteivs ed en pèr pi grond». Scu tg'igl cantun ò detg sen dumonda dalla FMR èn chegl oravant tot «igl fundamaint, igl material, la caraschia e la fiera». La zona da priewel cotschna è anunaschainta ed ena crudada ò gio donnagea igl mars passo ena tgesa. «Causa da chel evenimaint na lagn nous betg spitgier pi dei», dei Bruno Roussette, responsabel tigl Uffezi per la nateira ed igl ambiain digl Grischun. (fmr/sab) **Pagina 8**

ENGIADINA

Raquiints, ma eir bleras burlas da chatscha

La chatscha ha animà eir a blers auturs e poets engiadinais da scriver da quista paschiun, co chi tilla giordan e che chi han tuot fat durant ils dis sün guetta. Ün da quels auturs d'eira Artur Caffisch chi ha scrit bleras poesias da la chatscha. Oters auturs da raijunts da chatscha d'eiran Schimun Vonmoos e Men Rauch. Ün chi va adüna amo a chatscha es Göri Klainguti. (fmr/fa) **Pagina 7**



Da la chatscha esa gnü scrit üna pruna.

ILLUSTRAZIUN CHASA PATERNA/UNIUN DALS GRISCHS

SURSELVA

Giganto representa la Rumantschia

Ivo Orlik, ella scena musicala e tiels amatur dil rap pli enconuschents sut il num Giganto, representa la Rumantschia al proxim festival musical dallas minoritads europeicas ad Udine, in marcau ell'Italia dil nord. Suns Europe senumna la concorrenza musicala che ha sias ragischs en in studio da radio ch'emetta dapi ils onns 1980 en lungatg furlan. En ina fuorma ni l'atra exista quei festival da musica gia dapi igl onn 2009. Ivo Orlik selegra fetg da serender cun sia band igl october 2024 ad Udine per seppresentar en ina concorrenza musicala ad ina schuria e da sunar cun ulteriuras bands a caschun dad in concert. La davosa ga ha Mattiu Defuns representau la Rumantschia ad Udine igl onn 2019. El ed autras interpretas ed interprets romantschs han gia giu success al festival Suns Europe. (fmr/ac) **Pagina 5**

In vin che spetga sin siu temps

Il cataster da vin definescha exact, en tgei zonas ch'ei astga vegnir produciu vin el Grischun. La Foppa s'auda buca tier quei cerchel. Il Plantahof fa denton actualmeins silla vegna dils Candrians a Sagogn differentas mesiraziuns che pudessan esser la basa per ina lubientscha da vendita. La FMR ha visitau la vegna durant la raccolta dallas iuas madiras.

SANDRO BUCHLI/FMR

Sin ina spunda sulegliva da Sagogn creschan e prospereschian dapi rodun in decenni iuas dalla sort «Solaris». Duront che Aron (foto) e Hannes Candrian tgeran cun premura lur vegna e produceschan cun la raccolta onn per onn in pèr tschien butteglas vin alv, «cumbatta» il vin da Sagogn aunc per siu dretg d'existenza uffical. Il cataster viticol grischun lubescha tochen ussa mo en certas regiuns, ch'ei sut 600 meters sur mar sco il Segneradi ni il Puschlav, ina produczion da vin commerziala.

«Culla midada dil clima sestauscha il cunfin d'altezia da far bien vin.»

Aron Candrian,
viticulur da Sagogn

Midada dil clima, midada da cundiziuns

Las temperaturas creschentas pervia dalla midada dil clima porschan cundiziuns idealas per la viticultura, cunzun en regiuns pli aultas. Quei senta era il viticulur Aron Candrian: «Culla midada dil clima sestauscha il cunfin d'altezia da far bien vin.»

Perquei ha il Plantahof, il center d'agricultura grischun, ussa installau in indrez che mesira la temperatura ed auters facturs dalla vegna da Sagogn. Sche las mesiraziuns constattan e corrispundan al regulativ dil cataster da vin grischun, savessi esser che era il vin alv da Sagogn sa vegnir gustaus in bi dad amatur da vin. **Pagina 3**



«A pudess bain esser ch'eu vaiva eir ün miel chila dals guardgiachatschas.»

Göri Klainguti ha spetgà ditg da publitgar sias istorgias da chatscha. Chapibel, el na vuleva betg raquiintar ballas. – Pagina 7



30039

Servetsch d'abunents e da
distribuziun: tel. 0844 226 226
mail: abo@somedia.ch